

Ministarstvo za boračka pitanja Kantona Sarajevo, ul. Reisa Dž. Čauševića br.1, Sarajevo, koga zastupa **ministar mr. Muharem Fišo** (u daljem tekstu: Ugovorni organ) i **Bosna Bank International d.d. Sarajevo**, koju zastupa **Direktor Banke Amer Bukvić** (u daljem tekstu: Dobavljač), zaključili su u Sarajevu dana 06.06.2017. godine,

U G O V O R

o pružanju usluga plasmana i povrata odobrenih novčanih pozajmica za finansiranje programa za otvaranje radnih mjesta za branioce, ratne vojne invalide, porodice šehida i porodice poginulih, umrlih i nestalih branilaca Kantona Sarajevo- Lot 2

Član 1.

Predmet ovog ugovora je regulisanje međusobnih prava i obaveza u pružanju usluga plasmana, administriranja i praćenja povrata odobrenih novčanih pozajmica za finansiranje programa za otvaranje radnih mjesta za branioce, ratne vojne invalide, porodice šehida i porodice poginulih, umrlih i nestalih branilaca Kantona Sarajevo, a po otvorenom postupku sa objavom obavještenja za dostavljanje ponuda za izbor najpovoljnije poslovne banke za pružanje usluga plasmana i povrata odobrenih novčanih pozajmica za finansiranje programa za otvaranje radnih mjesta za branioce, ratne vojne invalide, porodice šehida i porodice poginulih, umrlih i nestalih branilaca Kantona Sarajevo u 2017. godini /u daljem tekstu: pozajmice/, a prema Obavještenju o javnoj nabavci broj: 920-1-2-5-3-24/17 objavljeno na Portalu javnih nabavki dana 24.02.2017. godine kao i u „Službenom glasniku BiH“, broj 15/17.

Član 2.

Po ovom ugovoru će se iz Budžeta Kantona Sarajevo za dodjelu pozajmica krajnjim korisnicima plasirati sredstva u iznosu najviše do 400.000,00 KM, koja će se plasirati sukcesivno u zavisnosti od dinamike odobravanja pozajmica i priliva sredstava u Budžet Kantona Sarajevo.

Ugovorni organ zadržava pravo da umanjuje izraženu ukupnu vrijednost ugovora ukoliko se isti bude morao smanjiti zbog nedovoljnog priliva sredstava u Budžet Kantona Sarajevo za 2017. godinu ili drugih opravdanih razloga, na koje ugovorni organ nema utjecaja, a što će procijeniti ugovorni organ.

Plasman sredstava se može nastaviti i u narednoj budžetskoj godini, a najviše do plasmana ukupno planiranog iznosa, odnosno u roku od najduže godinu dana od dana potpisivanja ovog Ugovora, a na način i pod uslovima propisanim Zakonom o javnim nabavkama BiH.

Ugovorni organ se obavezuje doznačiti sredstva za odobrene pozajmice na račun Banke nakon donošenja odluka o odobravanju pozajmica, odnosno nakon što Dobavljač dostavi ugovor o korištenju pozajmice zaključen sa korisnikom pozajmice, a u zavisnosti od stavljanja budžetskih sredstava odobrenih za ove namjene na raspolaganje Ugovornom organu.

Član 3.

Dobavljač se obavezuje da će za potrebe Ugovornog organa obaviti slijedeće usluge, i to:

- prijem i obradu zahtjeva za dodjelu novčane pozajmice dostavljenog putem Ministarstva, kontaktirati zajmotražioca, te po potrebi zatražiti dostavu/dopunu neophodne dokumentacije, analizirati i utvrđivati kreditnu sposobnost zajmotražioca, te po osnovu zahtjeva dostavljati na rješavanje Ugovornom organu prijedlog odluke uz stručno mišljenje o opravdanosti zahtjeva, u roku od 30 dana po prijemu;
- zaključivanje pojedinačnih ugovora o korištenju pozajmice sa korisnicima pozajmice po prijemu odluke Ugovornog organa o odobravanju pozajmice, a nakon uspostave

instrumenata obezbjeđenja povrata odobrene pozajmice od strane korisnika pozajmice i dobivanja potrebne dokumentacije od strane korisnika pozajmice;

- vršiti pojedinačne isplate korisnicima pozajmica i to do najmanje 50% iznosa pozajmice za plaćanje stalnih sredstava, a najviše 50% iznosa pozajmice za obrtna sredstva, koja se plaćaju korisniku na transakcijski račun po prethodnoj realizaciji stalnih sredstava;
- vršiti sve knjigovodstvene i druge poslove praćenja povrata pozajmice u periodu korištenja i otplate pozajmice;
- preduzimati mjere za redovnu i prinudnu naplatu dospjelih potraživanja po pozajmicama;
- pratiti povrat plasiranih sredstava (glavnica i profitna marža) i doznačavati otplaćena sredstva po glavnici na transakcijski račun trezora Kantona Sarajevo, a otplaćenu profitnu maržu na depozitni račun Kantona Sarajevo, do 10-og u mjesecu za protekli mjesec
- o stanju otplate Ugovornom organu i Ministarstvu finansija Kantona Sarajevo dostavljati mjesečne izvještaje sa pregledom otplate po glavnici i profitnoj marži kamati poimenično za sve korisnike pozajmice i to najkasnije 10 dana po isteku mjeseca.

Dobavljač se obavezuje da će usluge iz prethodnog stava obavljati u skladu sa Uredbom o finansiranju programa za otvaranje radnih mjesta za branioce, ratne vojne invalide, porodice šehida i porodice poginulih, umrlih i nestalih branilaca ("Službene novine Kantona Sarajevo", br. 31/06, 20/09, 20/11 i 16/14) i drugim propisima iz ove oblasti.

Dobavljač se obavezuje da po osnovu pružanja usluga u skladu sa ovim Ugovorom u svoju korist neće ništa naplaćivati od korisnika pozajmica.

Član 4.

Ugovorni organ se obavezuje da će na račun Banke uplatiti novčana sredstva na ime pruženih i fakturisanih usluga, u iznosima, kako slijedi:

- a) Prijem i obrada pojedinačnih zahtjeva za pozajmicu, analiza i utvrđivanje kreditne sposobnosti zajmotražioca u skladu sa Uredbom navedenom u opisu predmeta javne nabavke i dostavljanje prijedloga za odluku Ugovornom organu uz stručno mišljenje o opravdanosti zahtjeva (obrada predmeta) u iznosu od 2,00%, a minimalno 400,00 KM po zahtjevu, jednokratno nakon obrade pojedinačnog zahtjeva za pozajmicu i dostavljanja prijedloga za odluku;
- b) Zaključivanje ugovora o korištenju odobrenih sredstava i vršenje plasmana odobrenih sredstava – pojedinačna isplate u skladu sa odlukom Ugovornog organa u iznosu od 100,00 KM po finansiranju, jednokratno;
- c) Knjigovodstveno i drugo praćenje povrata finansiranja, poduzimanje mjera za redovnu i pokretanje prinudne naplate dospjelih potraživanja, vođenje evidencije o prilivu sredstava po osnovu pozajmice (glavnica i profitna marža) i doznaka istih Ugovornom organu na račun do 10-og u mjesecu za protekli mjesec, te izrada mjesečnih izvještaja sa pregledom otplate (realizacija i praćenje otplate) u iznosu od 1,50% p.a. na ostatak duga, uz obračun i plaćanje na mjesečnom nivou po principu proporcionalne mjesečne marže.

Član 5.

Instrumenti obezbjeđenja pojedinačnih pozajmica su:

- za pozajmice do 20.000 KM, institut sudužništva prema bankarskim pravilima i platežnoj sposobnosti istih, i mjenice;
- za pozajmice preko 20.000 KM, založno pravo na nepokretnosti (hipoteka) zasnovano notarski obrađenom ispravom u omjeru 1:2, i mjenice, o trošku korisnika pozajmice.

Član 6.

Dobavljač je dužan na račune trezora Kantona Sarajevo do 10-tog u mjesecu izvršiti doznaku sredstava po osnovu otplate pozajmica (glavnica i profitna marža) za protekli mjesec uz adekvatan zapis potreban za rasknjižavanje (npr. elektronski u csv formatu). Glavnica se uplaćuje na transakcijske račune, a profitna marža na depozitne račune Budžeta Kantona Sarajevo i to prema instrukciji Ministarstva finansija Kantona Sarajevo, koja će se Banci dostavljati kvartalno.

Član 7.

Period povrata sredstava pojedinačnih pozajmica je 8 godina, odnosno 96 mjeseci u jednakim mjesečnim obrocima, u okviru čega je grejs period od 12 mjeseci, a računa se od dana uplate sredstava korisniku pozajmice.

Profitna stopa za odobrene pozajmice iznosi 3% godišnje.

Dobavljač se obavezuje da period povrata odobrenih sredstava kraći od 8 godina može odobriti samo na zahtjev korisnika pozajmice, odnosno po odluci Ugovornog organa.

U slučaju povrata neiskorištenih sredstava dijela pozajmice ili pozajmice u cijelosti korisnik pozajmice će snositi obavezu po redovnoj profitnoj marži u iznosu obračunatom na neiskorištena sredstva za protekli period otplate do dana izjave o odustajanju od korištenja sredstava, pod uslovom da je protekli period otplate duži od mjesec dana. Ukoliko ova sredstva ne budu blagovremeno vraćena na transakcijski račun trezora Kantona Sarajevo Dobavljač je dužan na ista Ugovornom organu platiti **a vista** prinos po tarifi Dobavljača.

U slučaju prijevremene otplate pozajmice korisnik pozajmice će snositi obaveze po redovnoj profitnoj marži u iznosu obračunatom za protekli period otplate do dana otplate duga po glavnici. Prijevremenom otplatom smatra se otplata ostatka duga po pozajmici u cjelosti i odjednom prije roka njegovog dospijea.

U slučajevima namjenskog korištenja pozajmice i potpuno urednog izmirenja obaveza vraćanja iste korisnik pozajmice se oslobađa plaćanja posljednje rate i ima prednost kod odobravanja nove pozajmice. Urednim vraćanjem pozajmice podrazumijeva se plaćanje obaveza po profitnoj marži i glavnici u skladu sa otplatnim planom.

Član 8.

Dobavljač se obavezuje da će sredstva doznačena od Ugovornog organa za pojedinačnu odobrenu pozajmicu koja ne budu plasirana korisniku pozajmice biti vraćena na transakcijski račun trezora Kantona Sarajevo u roku od 90 dana od dana doznačavanja, odnosno po nalogu Ugovornog organa.

Član 9.

Troškove vođenja eventualnih sudskih sporova, sudske takse, angažman eventualnih spoljnih saradnika, vještaka i slično, u slučaju neblagovremene i neuredne otplate radi postupka prinudne naplate putem nadležnog suda, snosit će Ugovorni organ na osnovu fakturisanih stvarnih troškova akontativno do konačne naplate od korisnika novčane pozajmice, a koje će Dobavljač po naplati od korisnika (u slučaju uspjeha spora) vratiti Ugovornom organu.

Član 10.

Dobavljač sa korisnicima pozajmica neće sklapati podugovore ni o jednom bitnom dijelu ugovora (izuzev ugovora o hipoteci) bez prethodnog pismenog odobrenja Ugovornog organa. Elementi ugovora koji se podugovaraju i identitet podugovarača obavezno se putem prijedloga saopćavaju Ugovornom organu blagovremeno prije sklapanja podugovora.

Ugovorni organ će obavjestiti Dobavljača o svojoj odluci u roku od 15 dana nakon prijema saopćenja, navodeći razloge u slučaju odbijanja prijedloga.

Dobavljač snosi punu odgovornost za realizaciju ugovora o korištenju pozajmice zaključenog sa korisnikom pozajmice.

Član 11.

Ugovorni organ shodno članu 72. tačka 6. Zakona o javnim nabavkama BiH postavlja uslov da dobavljač kome je dodijeljen ugovor o javnoj nabavci nema pravo da zapošljava, u svrhu izvršenja ugovora o javnoj nabavci, fizička ili pravna lica koja su učestvovala u pripremi tenderske dokumentacije ili su bila u svojstvu člana ili stručnog lica koje je angažirala Komisija za nabavke, nadležna za dodjelu navedenog ugovora o javnoj nabavci, najmanje šest mjeseci po zaključenju ugovora.

Član 12.

U slučaju nenamjenskog korištenja sredstava Dobavljač raskida ugovor sa korisnikom pozajmice i naplaćuje cjelokupni odobreni iznos, koji vraća Ugovornom organu.

Član 13.

Ovaj Ugovor je na snazi sve do njegove potpune realizacije, odnosno do povrata cjelokupno plasiranih sredstava sa profitnom maržom Ugovornom organu.

Član 14.

Sve eventualne sporove ugovorne strane će rješavati sporazumno, a ako se sporazum ne može postići nadležan je sud u Sarajevu.

Član 15.

Ovaj Ugovor je sačinjen u 5 (pet) istovjetnih primjerka od kojih svaka ugovorna strana zadržava po 2 (dva) primjerka, a 1 (jedan) primjerak se dostavlja Ministarstvu finansija Kantona Sarajevo.

Član 16.

Ovaj Ugovor stupa na snagu danom potpisivanja.

Za Dobavljača:
Direktor Banke

Amer Bukvić

Broj: 032-05-2111/17
Sarajevo, 06.06.2017. godine

Za Ugovorni organ:
Ministar

mr. Muharem Fišo

Broj: 06-14-11540-2/17
Sarajevo, 06.06.2017. godine

